



TAPAK 10

Bournemouth-i Manager Jason Tindall mapa nungi anentsü

TAPAK 8

Myanmar police-i Aung San Suu Kyi anema ken o benok

VOL. XVIII NO. 111 (ADOK 111) DIMAPUR

YANGTEPNÜ (THURSDAY) TSÜKLAI (FEBRUARY) 04, 2021

₹ 5.00

COVID Nagaland: Nisung 16 dak putet

Kohima, February 3 (TYO): Bodbarnü Nagaland nung nisung 16 dak COVID-19 aliba putet aser parnok züngsema nisung ajak agi 12,117 kümogo.

"Tanü Kohima nung nisung 15 aser Dimapur nung nisung ka dak COVID-19 alibaji putet. Külen, Dimapur nungi nisung 5 taneptsü angu" ta Health & Family Welfare Minister, Pangnyu Phom-i metetdaksü.

Tanü tashi nung Nagaland nung nisung 11,815 tashi taneptsü nguogo aser parnok 66 tang anepaludar, ta paisa ashi.

Nagaland nung COVID-19 aliba puteter nisung 88 süogo saka parnok nisung 10 bo tanga timtem ajanga asü. Maneni, nisung 148

tashi tanga state temi ogo.

Nisung 12,117 rongnung Traced Contacts 5002, armed forces personnel 4,674, tanga state tem nungi arur 1,868 aser Frontline Workers 573 lir, ta Bodbarnü COVID-19 Dashboard nung metetdaksüogo.

Tang anepalurtem rongnung nisung 9 dak shirangba yimya terara lir aser 57 dakbo shirangba yimya mali, ta Dashboard nungsa shia lir.

February 3, 2021 nü sample 121 tendang aser tang tashi nung Nagaland nung COVID-19 alitsü akok ta temolung melemi bilemba sample ajak agi 1,25,331 tendangogo, ta COVID-19 Dashboard nungsa metetdaksüogo.

Aor MLA ajak NFHRCC senden nung adentsü mepishir: DALT

Dimapur, February 3 (TYO): Nagaland Foothills Road Co-Ordination Committee (NFHRCC)-i kin hoho 11 aser MLA ajak senden amentsü jaokba nung Aor MLA ajak adentsü mepishir, ta tanü Dimapur Ao Lanur Telongjem (DALT)-i metetdaksü.

NFHRCC-i February 5, 2021 nükin hoho 11 aser MLA ajak senden ka amentsü jaokba atema tenüngsang agütsür, ta parnokisa ashi.

Taküm tzungluruwa matongdang foothills road asangsang nung tembanga yanglutsü atema iba

senden nung Aor MLA ajak dena telemteba agitsü mepishir, ta parnokisa shisem.

Iba senden nung taküm tzungluruwa matongdangsa gari senzütetsüsa lenmang yanglutsü atema telemteba agitsü imlar. 1970s tom ka nungi asenoki kanga dang aremzüka iba lenmang yanglutsü atayonga arur.

NFHRCC-i nübortem ajangzüksü atema political party telemsa kecha melii inyakba ya mapa tajung aser iba ya tanü Nagaland-i nüngdaker, ta DALT-isa metetdaksü.

Committee on Subordinate Legislation senden jateper

Dimapur, February 3 (TYO): Committee on Subordinate Legislation nung Chairman, Dr. Imtiwapang Aier-i Committee on Subordinate Legislation senden ka amentsü jazükir, ta Commissioner & Secretary, NLA, Dr. P.J. Antony-i metetdaksü.

Sendenji February 8, 2021 nikongdang 2:00 ako nung Committee Room, Assembly Secretariat nung alitsü. Anungji, Committee on Subordinate Legislation nung züngsem ajak arua adentsü mepishir, ta Commissioner & Secretary, NLA-isa ashi.

Rihanna aser Greta Thunberg nungeri aluyimer pusemba aitsür

New Delhi, February 3 (Agencies): India nung aluyimertemi lungkak aitba atema tebilemtsü bena nüngtugu pop kentener Rihanna, climate activist Greta Thunberg aser US vice-president Kamala Harris'er kinunger lawyer Meena Harris nungeri osang balala lemsatepba sülen Ministry of External Affairs-i iba atema telangzüba ka agütsüogo.

Parnoki sangoktsüba osangtemji shitak masü ta MHA-i metetdaksü.

"Pei ajangzüksü atema bilemba telok kari aluyimertem lungkak aitba nungi tajangzüik angutsü meranger. Iba ya January 26 nü kuli nguogo" ta ministry-i ashi.

"Pei ajangzüksü atema bilemba teloktemi India anema international teyari angutsü merangogo. Item teloktemi ajungmesoa alima kübok tesem balala nung Mahatma Gandhi indang kürakyanglutem raksatsüogo. Iba ya India asoshi aser alima nung shiameteter aliba lokti asoshi tebilemtsü ka lir" ta MHA-isa ashi.

Mongulbarnü CNN-i India nung aluyimertemi lungkak aitba indang ocet ka züluba Twitter nung lematep. "Kechiba asenoki iba atema mejembir?" ta lai asüngdang.

Rihanna-i iba osang lemsatepba sülen Greta Thunberg, Meena Harris aser Mia Khalifa nungeria Twitter nung tebilemtsü abenba metetdaksü.

Iba atema Central minister aikati Twitter nung foreign celebrity tem aitsüogo. India tenüng menüksütsü atema alima nung tasa atonga inyakba nung iba ya shilem ka lir ta minister temi ashir.

Home Minister Amit Shah, Finance minister Nirmala Sitharaman, Minister of State for Road Transport & Highways VK Singh, Union minister Kiren Rijiju, Union Cabinet Minister for Textiles and Women & Child Development Smriti Irani aser Union Minister for Housing & Urban Affairs Hardeep Singh Puri nungertemi hashtags #IndiaTogether #IndiaAgainstPropaganda amshia international celebrity tem aitsüogo.

Neiphiu Rio-i NERPC chairman mapa agizükogo



February 3, 2021 nü Nagaland Chief Minister Neiphiu Rio-i Meghalaya Power Minister James Sangma ket nungi NERPC chairman mapa agizükdang tangokba noksa angur. Noksa nungsa Nagaland Power Advisor Tovihoto Ayemi angur. (Kohima, February 3)

Kohima, February 3 (TYO): Nagaland chief minister Neiphiu Rio-i Bodbarnü North Eastern Regional Power Committee (NERPC) chairman inyaksü agizükogo.

Nagaland CM Rio ya March 16, 2020 nü NERPC chairman shima liasü saka COVID-19 wara ajanga tanü nungi iba mapa agizüka inyaker. Meghalaya nung Power Minister aser taoba chairman James Sangma ket nungi tanü pai mapa agizük.

NERPC ya North East state ajak nung power sector dak sendakba onüktem lemsatepba telok tematiba lir. Iba nung Transmission aser Generation Utilities dena lir.

State aser utilities ajak kati ka teyari nüngdaker asünung NERPC amen aser committee züngsemtemi February 12 nungi 20, 2021 tashi assembly session nung benoktsü onüktem lemsatep.

NERPC indang Chairman ya northeast state tem nungi Power

Minister tem melentepa küm kaka inyaker.

Külen, CM Rio-i February 4 nü Technical Coordination Committee (TCC) aser NERPC indang senden 21 buba nung o jembitsü. Iba sentong ya Hotel Vivor, Kohima nung anepdang 10:30 ako nung agitsü.

Sentong nungsa North Eastern Region nungi Power Minister temi o jembitsü aser Member Secretary NERPC A. K. Thakur, IES-i okila jembitsü.

Bodbar nungi Hotel Vivor, Kohima nung 21 buba Technical Coordination Sub-Committee (TCC) & North Eastern Regional Power Committee senden tenzüko.

"India nüjiso anguba sülen power sector kanga renlokogo aser December 2020 tashi nung 374 GW jungnüa amenokogo. India nung national Grid tulutiba lir aser ibaji

voltage levels balala nung transmission lines 4,33,510 circuit KM lir," ta Chairman TCC & E-n-C, Department of Power Nagaland, Er. Shikato Sema-i ashi.

"NER Grid indang Power demand ji 2009-10 nung 1.5 GW aliba nungi 2019-20 nung 3 GW shi ka kümogo. 2009-10 nung 690 MU/month aliba nungi 2019-20 nung 1360 MU/month kümogo aser ibaji küm ter tsüngda 100% inlokba lir," ta Er. Shikato-isa ashi.

NEEPCO, OTPC aser NTPC nem sentsüh aika menoktsü aliba indang ashidang Er. Shikato-i züngsem ajak dang sentsüh yakta agütsütsü atema ayongzüik.

Iba sentong nung Er. Moa Aier, CE (D&R), DoP, Nagaland-i Assam, Arunachal Pradesh, Tripura, Mizoram, Meghalaya, Manipur aser Central ketdangsürtem ajak pelashishia agizük.

13 buba NLA session atema sentong renemogo

Dimapur, February 3 (TYO): February 2, 2021 nü Business Advisory Committee (BAC) senden amandang 13 buba NLA indang session tenetbuba atema sentong renemogo, ta Commissioner & Secretary, NLA, Dr. P.J. Antony-i metetdaksü.

Sendenji NLA Speaker, Sharingain Longkumer menden ser amen aser committee züngsemtemi February 12 nungi 20, 2021 tashi assembly session nung benoktsü onüktem lemsatep.

Committee-i lemtetba onüktem:

- Governor's Address
- Obituary references
- Motion of Thanks to the Governor's Address
- Questions
- Laying of Annual Administrative Reports
- Laying of Reports/Rules
- Presentation of Assembly Committee Reports
- Debate and Adoption of Motion of Thanks to the Governor's Address
- Introduction of Government Bills

- Introduction of Government Resolution
- Consideration and Passing of Government Bills
- Consideration and Adoption of Government Resolution
- Presentation of Supplementary Demand for Grants for the year 2020-2021
- Presentation of Budget for the Year 2021-2022
- Presentation of Supplementary Demand for Regularization of Excess Expenditure for the year 2012-2013
- Presentation of Supplementary Demand for Regularization of Excess Expenditure for the year 2013-2014
- Discussion on Matters of Urgent Public Importance
- Discussion and Voting on Supplementary Demand for Grants for the year 2020-2021
- Introduction, Consideration and Passing of the Nagaland Appropriation (No.1) Bill, 2021.
- Discussion and Voting on the Budget for the year 2021-2022

- Presentation of Comptroller and Auditor General of India Report (C&AG)
- Introduction. Consideration and Passing of the Nagaland Appropriation (No.2) Bill, 2021.
- Discussion and Voting on Supplementary Demand for Regularization of Excess Expenditure for the year 2012-2013
- Discussion and Voting on Supplementary Demand for Regularization of Excess Expenditure for the year 2013-2014
- Introduction, Consideration and Passing of the Nagaland Appropriation (No.3) Bill, 2021.
- Introduction, Consideration and Passing of the Nagaland Appropriation (No.4) Bill, 2021.
- Announcement of the Constitution of various Financial and Non-Financial Committees and Panel of Chairmen by the Speaker
- Unfinished Business, if any
- Adjournment of the Session sine-die

Kohima-Jessami 2-Lane Project atema ali kibur nem sen agütsütsü

Dimapur, February 3 (TYO): February 10, 2021 nü Kohima-Jessami 2-Lane Project atema ali kiburtem nem sen agütsütsü, ta Kohima Deputy Commissioner, Gregory Thejawelie NCS-i metetdaksüogo.

Iba ya Km 29.60 nungi Km 37.05 (Package -II) nung adenertem atema lir aser anepdang 10:00 ako nungi Deputy Commissioner indang office nung agütsütsü.

Iba anogo ali kiburtem tsüngdong arutsüla aser passport

size photos (copy 4), Aadhar card (Xerox)/ I.D Proof aser Bank Passbook (front page Xerox) bener arutsüla. Kibur dak alaka tangar shinga nem sen magütsütsü, ta DC Gregory Thejawelie-isa metetdaksüogo.

Ao Musical Revival Volume 2 sayaogo



Noksa nung (abelen nungi achichi) Talitemjen Imchen, C. Purtoshi Jamir aser Bendang Imchen nungertem angur.

Dimapur, Tsüklai/February 03 (TYO): Ao Musical Revival Volume 2 kensep February 2, 2021 nü, tayonger Talitemjen Imchen kidang sayaogo. Iba sayaba mapang tayonger-i kentenertem parnok 18 tashi dang pelaba metetdaksü. Corona virus tashidak wara tesashi liaka, kentemertem-i pei molungso aser molungtetba dak tamang tulu yur ken atenba ajanga takok nguogo, ta ashi.

Music Bakery kibur Sosang Longkumer-i, ken ajak nung kensü den tapet kongki ola tajung asoshi tenüngsang agütsü. Videographer Charles Cresen ya Ao Musical Revival telok asoshibo video mangaoktsü tajungtiba, ta menürema shisem. Ajak den alia A. Chuba Ozüküm'ar kibongi adoktsüba ajanga, iba Ao Musical Revival Volume 2 ya ketdangsüa

yanglutetba dang lir, ta tayonger-isa shisem.

Tayonger-i ashiba agi, kensep ka adoktsü mapa temela masü. Nüken-nüktzü jenti indoka kongki-keno yanglutetba amaji, ken meimertem-i meraketa amshitsü nüngdaker. Mesüra Ao kin asoshi kongki-keno tsütsü samaa aotsü anasa dang lir. Gari aoyaba, sen aoyaba mesüra rakzükrakterem atema dang ozüing ali masü, saka kensep raksatsürtem asoshia ozüing lir. Anungji shingai kensep raksatsütsü temerang aser kati ka ket nung belenzüktepa amshitsü temerang, ta Talitemjen Imchen-i ashi.

Tawatasü technology tajung aliba ajanga raksatsütsü ajaklen nungi akoker, yamaji shibai kechi amshir mesüra inyaker, technology ajungba ajanga ajak metetadoker. Anungji kari danga

aibelen putetra, ozüing melaba ama inyaksü ta amokmeren olen ka pai shisem.

Ao Musical Revival Volume 2 saya nung külem züingsem, Bendang Imchen aser C. Purtoshi Jamir nati o tatsütsü jempiba den kensep meshiteta sarasadem.

Iba Ao Musical Revival Volume 2 kensep nung ken 12 lir aser pen drive (Music card) nung adoker, kensep jenjang sen 1000 agi item dokangtem nung angutsü; Zenith C.D Library, Kohima (Fira Hotel Opposite Jail Colony) Phone No. 7085994958, Eastern Book Depot, Mokokchung (MTBA down stair) Phone No. 9862983463 aser Christian Literature Center, Dimapur (Nyamo Lotha Road) Phone No. 8794016520. Iba den külem kentener telok züingsem ket nungia iba kensep ya angutsü.

MOLUNG NEN O



**Tasoba Anogo
15.12.1926**

**Tasüba Anogo
27.01.2021**

**Asür Ojala Imsennungla (W/O Lt.Imkongsowa)
Meküli Village**

Oja! Teti asoshi na onok nungi pila-a oaka, nü temeim onok den teti lir, Künü Kibuba sentsuwangshi nung nü den ajurutsü yimla-a onok molung süneper.

Ojala shirang yipden nung alidang nungi tasüba anogo tashi Kija, Kibong, Kiyonger, Arogo, Yimden, Yimeryimsanger aser telok balala shirnokisa Sarasadem, nübo, rongsen aser tsüngdong maparen agi yaritepogo, ajak dang kangasa pelaba lemsateper. Nenok temeim mapa tulu asoshi Tsungremi moajang ta onok sarasadem.

Iba dang nungi alia Dr&Mrs. Tiameren Ao, Mongsenyimti Village, Pa aser par kibongi Ojala shirangba mapang nungi tasüba anogo tashi yaritepa aru nung, par kibong dang kanga pelaba lemsateper. Tsungremi nenok ajak moajangma.

-Temeim Chirnurtem, Semchirtem aser Anukapangtem

Dimapur Police-i ozüingnungaibelenertem apu

Dimapur, Tsüklai/February 03 (TYO): Sontipur District nung nisung tepsetba aser gari nung rakzükrakteremba dak sendakba nung Assam Police den külemi Dimapur Police ajanga February 2, 2021 nü operation ka agiba mapang arishi küm 25 tain Biswajit Mech aser arishi küm 40 tain Saliatro Khempari na apu, ta sangdong ka ajanga ashi. Tenati rakzükbba gari tanaben ngutetogo.

Naharbari, Diphupar aser Doyapur area nung police temi tanen makai bushisüingdangba

ajanga nisung ana ya apu aser gari ya ngutet. Iba operation nung apur den tena ket nungi ngutetba gari ya Assam Police nem agütsüogo, ta osang ajanga ashi.

Maneni Karbi-Anglong Police teyari nung Women Police station staff temi Kiphire District nung tanur tetsür asem samar aliba February 2, 2021 nü arrtsülen New Field Check Gate anasa kumzüük. Iba dak sendakba nung tanurtem kinunger den tanaben lungjemtsü atema nüngdakba meratem agiogo, ta sangdong ajangasa ashi.

Kohimanung Fisheries & Aquatic Resources Dept. ajanga training agütsü



Deputy Director Neitho-o Kuotsu den Principal Scientist, Dr. R.S. Halder aser dangartem Kohima village nung January 29 & 30, 2021 anogotem ananü training agütsüba mapang tangokba noksa ka yangi angur.

Dimapur, Tsüklai/February 03 (TYO): Kohima village nung Department of Fisheries & Aquatic Resources ajanga ICAR- Directorate of Cold Water Fisheries Research (ICAR-DCFR), Bhimtal, Uttarakhand den lungjemer "Socio Economic Development through Scientific Fish Farming under Tribal Sub Plan Scheme (TSP)" project kübok onük balala nung ajemdaker training & field demonstration sentong ka January 29 & 30, 2021 anogotem ayongzüka liasü.

Deputy Director aser iba Program indang Nodal Officer, Neitho-o Kuotsu ajanga iba project koda tongtipang aser scientific yimya amshia anga metsüba indang rateta ashi.

Sustainable, productive fisheries & aquaculture ajanga

chiyongtsü tajungba kumdahtsür, senotsü aruba lenmang tesadamba kumdahtsür, libaliru tajungba akumer, rongsenketsüing ainer aser asen müketa aliba tüzü-mopung aser ali rongsen wazüka ayur, ta pai ashi.

Dr. R.S. Halder, Principal Scientist & Nodal Officer for NEH activity, ICAR-DCFR ajanga anga metsüba nung scientific yimyatem amshitsü indang ashi. Pai state nung aluyimer aser entrepreneur tem dang rongsenketsüing ajungkettsü aser danga state nungi anga tamajung bener arua achiba nung metaloka malitsü atema scientific yimya nung anga metsütsü ayongzüka liasü.

Iba sentong nung Dr. Vimezo Kire, District Fishery Officer, Kohima ajanga common carp

metsüba indang jembiba mapang takok ngua anga tajungtiba nung metsütsü atema anga metsü tajung amshitsü aser parnok nung chiyongtsü tajung agütsütsü kanga tongtipang lir, ta ashi.

Sub Divisional Fishery Officer, Khriezhato Nakhro-ia tüzülu nung anga metsüba ajanga state kübok yimtak-yimtsüngtem nung rongsenketsüing renlokba indang jembia liasü.

Ango metsütsü kanga janrar Rokuo Kire-i Department of Fisheries & AR nung Director aser Officers aser ICAR-DCFR, Bhimtal dang iba ama training sentong ayongzükbba atema pelaba lemsateper aser iba project takok ngua inyaksü atema nendaka inyaksü, ta ashi.

Tanü 21 buba NERPC senden nung Nagaland CM-i jembitsü

Dimapur, Tsüklai/February 03 (TYO): 21 buba North Eastern Regional Power Committee (NERPC) senden ya February 04, 2021 nü Hotel Vivor, Kohima nung anepdang 10:30 ako nungi tenzüka amentsü lir.

Iba senden nung North

Eastern Region indang Power Minister temi o jembitsü, kong A. K. Thakur, IES, Member Secretary ajanga iba senden indang nükjidong nung ajemdaker jembitsü aser Nagaland Chief Minister, Neiphiu Rio-ia jembitsü, ta sangdong ka ajanga ashi.

Planning Department ajanga department balala dang metetdaksür

Dimapur, Tsüklai/February 03 (TYO): Additional Development Commissioner, Nosazol Charles-i sangdong ka nung ashiba agi, COVID-19 tashidak wara mechi 2020-21 mapang Calendar of Activities mapa kuma inyaka aoba nung menutsüsa akum. Ajisüaka financial year mapang proposal nungtepba nungi kumzüksü aser State Budget Session tenzüksü aliba mechi state sorkari examination aser clearance atema Planning Department nem proposals

agütsütsü atema anogo ka alitsü lemtetogo, ta ashi.

Anungji Department ajak dang pei department indang proposal ya Planning Department nem temonutiba agi February 25, 2021 tashinung agütsütsü mepishir, aser ashiba ama meinyaktetra tang tashi mamshi aliba senotsü tanaben lemshitsü atema tematiba ketdangsürtem dangi abentsü. Saka iba inyakyim nung CSS, NEC, NLCPR, NESIDS aser Negotiated Loan amala indang proposal madentsü, ta sangdong ajangasa ashi.

Tanü 21 buba NERPC senden nung Nagaland CM-i jembitsü

Dimapur, Tsüklai/February 03 (TYO): 21 buba North Eastern Regional Power Committee (NERPC) senden ya February 04, 2021 nü Hotel Vivor, Kohima nung anepdang 10:30 ako nungi tenzüka amentsü lir.

Iba senden nung North

Eastern Region indang Power Minister temi o jembitsü, kong A. K. Thakur, IES, Member Secretary ajanga iba senden indang nükjidong nung ajemdaker jembitsü aser Nagaland Chief Minister, Neiphiu Rio-ia jembitsü, ta sangdong ka ajanga ashi.



COME ONE, COME ALL

Do visit us at the
SPECIAL HANDLOOM EXPO
AT URBAN HAAT, DIMAPUR

From : 28/01/2021
Time : 10:00 a.m to 5:00 p.m

ENTRY FREE

For Your Safety
Please Wear A Mask

Maintain Social Distancing

PARTICIPANTS FROM VARIOUS STATES OF INDIA.
A MEGA EVENT OF EXCLUSIVE RANGE OF HANDLOOM PRODUCTS,
DAY TO DAY UTILITIES & DECORATIVE ITEMS, INNOVATIVE &
WELL DESIGNED LADIES & GENTS WEAR, TRADITIONAL SHAWLS,
JACKETS, BED SHEETS, CUSHION COVER, CARPETS,
HANDICRAFT ITEMS, BASKETRY ETC.....

ENJOY THE HANDLOOM COLOURS OF INDIA

ORGANISED BY:
Nagaland Handloom & Handicrafts
Development Corporation LTD
(A Govt. of Nagaland Undertaking)
Dimapur : Nagaland

SPONSORED BY:
Office of the Development Commissioner
for Handlooms, Ministry of Textiles,
Govt. of India, New Delhi

FCI jang samaba atema taoba general manager apu

Guwahati, February 3 (Agencies): Bodbarnü Assam nung BIEO-i taoba Food Corporation of India (FCI) G.S.S. general manager Raja Shekhar puogo.

Sen crore aika alangba jang truck aika samaba ken o dak sendakba nung pa apu.

Raja Shekhar ya 2013-14 tsüingda FCI, Guwahati nung general manager inyak aser tanü Bureau of Investigation (Economic Offence) ketdangsürtemi pa apu. Tanü pa chief judicial magistrate (CJM), Kamrup Metro tsüingdang anir oa ken o ka benokogo.

2020 küm Raja Shekhar-i FCI nungi sodi ngua liasü.

Iba ken o dak sendakba nungsa taoba FCI general manager aser Indian Railway Service (IRS) officer

Laksheswar Saikia pua lir.

2013-14 nung Rs 5 crore (suit value) alangba jang abenba track 111 tashi FCI contractors-i auya. Iba ya parnoki FCI ketdangsürtem den angatettepa inyakba liasü.

Indian Railway Service (IRS) officer Bhaskar Hazarika-i tsük alizükba nunga tim mesüi inyakogo ta tai tongloksü. Pa ya Shillong aser Devanand FCI nung general manager inyaka liasü. Paisa FCI Guwahati nunga general manager inyakogo.

Ken o tem adokba sülen ketdangsürtemi Devanand menden ajema kümstü aser pa Guwahati nung aliba FCI zonal office nung deputy general manager (DGM) inyakdaksü.

FCI Nagaoan godown nungi Tawang aser Nagaon nungi Seppa tashi jang abenba truck

aika samaba ajanga FCI-i Rs 2.36 crore akoksa ta osang nguteta lir.

Iba dak sendakba nung BIEO, Assam Police tsüingdang ken ana benok. Ka RKK Enterprise den sendaka truck gari 10 samaba aser ka 4A Enterprise den sendaka truck gari 101 samaba liasü.

Rs 2.36 crore akoksaba nungi FCI ketdangsür aser staff ket nungi Rs 88 lakh aser contractors ket nungi Rs 97 lakh ngutetogo.

FCI-i Nagaon aser Jorhat indang district courts nung contractors M/s 4A Enterprise aser M/s RKK Enterprise anema ken o tem benokba sülen senji meyipa angu.

FCI ketdangsür kari taoba general manager Shekhar chioktsü atema rongshir ta Assam Police-i ashi.

Manipur nung BJP lennir 6 den züngsem 200 Congress nung aden

Imphal, February 3 (Agencies): Mongulbarnü Manipur nung BJP lennir 6 aser züngsem 200-i Indian National Congress (INC) nung denogo.

BJP züngsemtem rongnung Khongsang village chairman

& Ex-BJP president Kilongdi Gonmei, Rengpang ADC Segment, Ningchuipou Kamei, vice-president, BJP Booth Level Committee, Rengpang village, Solomon Kamei, Neilalung Gonmei, Pudonlung Kamei aser

Jathuanlung Kamei nung dena lir.

Iba sentong nung Congress Working Committee (CWC) züngsem G. Gaikhangam aser MPCC President Govindas Konthoujam nati parnok pelaa agizük.



Bodbarnü Chirang police-i shidi tezü shibelener nisung ka apu. Iba nisung ya Mintu Choudhury ta jangjaogo aser pa ket nung shidi tezü 6 bena liasü. Osang tejangja ka angazükba sülen Wildlife Crime Control Board aser Chirang police-i mita aodang pa apu.

Manipur nung contract health worker temi Secretariat nungpoka atutsü merang

Imphal, February 3 (Agencies): Mongulbarnü COVID-19 contractual health care mapa inyakertemi Imphal nung Manipur Chief Minister indang Secretariat telungi aitsü merang.

Multi-tasking staff aser staff nurse temi parnok service atsülangtsü aser ita pezü indang itasen meshia lungkak aiter.

Yaküm COVID care centre tem nung nübo peria maliba atema Manipur sorkari parnok ya contractual basis nung anioka liasü.

Anogo ishika jelia parnoki State Health Services indang Director office shibangtsü. Parnokisa Hombarnü mener lungkak ait.

Mongulbarnü lungkak aiter temi Babupara nung

Secretariat kishi tonga aodang police-i parnok Nupi Lal Memorial Complex tashi noktang.

Parnoki chief minister den ajuruteptsü atema akhang saka ibaji makok.

Health department-i yaküm August ita staff nurse 150, multi-tasking staff 100 aser medical officer 74 tashi ita asem atema shimoka liasü.

Contract nung shimokertem mapang tembangtsü lia tawa tu Chief Minister N Biren Singh-i parnok joko mapa meinyakdaksütsü ta metetdaksü.

Manipur nung COVID-19 puteter ajema akümba agi contract nung mapa inyaktsü shimokertem joko menüingdaksü, ta pai ashi.

Chiyungtsü nung miim chisemer nisung 1asü; 175 shirang



Diphu, February 3 (Agencies): Karbi Anglong district kübok Diphu Medical College and Hospital (DMCH) nung chiyungtsü nung miim chisemba sülen nisung ka asü aser 175 shirang.

DMCH nung sentong ka agidang chiyungtsü packets lema agütsü aser iba nung miim chimsemer Kangbura Bey asü. Pa ya Bakalia nungi liasü.

Mongulbarnü medical college Assam chief minister-i medical college nung MBBS course tenzüjka liasü.

DMCH nung miim chisemer nisung 145 tashi anioka anepalu aser parnok rongnungi nisung 30 anizükogo.

Iba osang angashiba sülen

Karbi Anglong Autonomous Council (KAAC) Chief executive member Tuliram Ronghang Bodbarnep mozü ki tonga aru.

"Doctor temi akokba tashi chiyungtsü nung miim chisemertem anepaludar. Shirangertem temang tajungba kümдар" ta Tuliram Ronghang-i ashi.

"Chiyungtsü indang sample tendangtsü atema laboratory-i yokogo. Iba lendong atalokba atema bushisüingdangtsü aser aibelenertem merenshitsü" ta Ronghang-isa ashi.

Bodbarnü KAAC züngsemtemi shirangertem nem kombol angati lema agütsü.

Tripura nung tesayurtemi ano lungkak aittsü

Agartala, February 3 (Agencies): Tripura nung mapa nungi anentsüba tesayurtemi ano Agartala nung lungkak aitba sentong tanga ka agitsü sentong renemogo.

Iba asoshi parnoki police administration dang temelaba meshia shidi ka züluogo. Ajisüaka, police-i parnok nem temelaba magütsü.

Onoki lungkak aittsü atema police-i temelaba magütsü anungji onoki High Court nung ken o benoktsü, ta tesayur lennir Kamal Deb-i ashi.

January 27 nü Agartala nung tesayurtemi dak teka sangshiba atema onoki West Agartala police station nung police ketdangsür 5 anema ken o benoktsü ao saka magizük, ta Deb-isa ashi.

Iba anogo ketdangsürtemi tashiyim amshi. Iba lendong nung tesayur aika yiru aser aika mozü kidang anepaludar.

Mapa nungi anentsüba tesayurtemi West Tripura

superintendent of police, SDPO Agartala, SDPO Amtali, SDPO Jirania aser West Agartala police station officer-in-charge anema ken o benoknür.

Police ketdangsür 5 anema onoki Tripura High Court nung ken o benoktsü, ta Deb-isa metetdaksü.

Külen, Mongulbarnü intellectuals, writers, journalists, professors aser lawyers dena telok kati Agartala nung tesayurtemi pusema lungkak aitba sentong ka agiogo.

December 7, 2020 nungi mapa nungi anentsüba tesayurtemi Agartala nung lungkak aittsü tenzüker aser January 27 nü police administration-i parnok tashiyim agi senshidaksü.

Iba sülen parnoki Tripura Chief Minister'er ki jakdang lungkak aittsü tenzüker saka idakji police-i parnok dak tzü, tenük amba mokozü aser süng amshi senshidaksü.



TIR YIMYIM YIMOBILEM (EDITORIAL)

DIMAPUR YANGTEPNÜ, TSÜKLAI (FEBRUARY) 04, 2021

LENMANG YANGLU MASHI!

Dimapur aser Kohima na tsünga National Highway 29 nung 4 lane kuma lenmang ulushia teyangludakba tesem lenkalen lungren nungi long anenzuka alua gari pezü anembangba lendong nung, nisung asem yiruba dak alaka, nisung ka danga mesüi kumzükba ni sunung nuk agibo angutsü makokba tesungmangtsü Tsüngrem taochi teka agi kumzükogo ta angatetter. Aser ano külen, iba ama tetsübuttsü lendong atalokba ya lenmang yanglurtemi lenmang yanglu mashi ser mapa tezuba apia inyaker toktsüba ajanga atalokogo ta bilemer. Aji oda, tang Nagaland nung National Highway inyaker temi inyakba yimya nung ya mapa tema yutsü nungbo Naga nungerbo anentsü agi dang masü saka yakanü Dimapur-Kohima lenmang nung atalokba lendong amato tenem kolaklen nungi longrang anenzuka alua gari aser nisung anembangba lendong atalok manentsü. Atangji, kong südirsüaka National Highway lenmang yanglurtem yabo alima tesem balala nung gari lenmang yanglur International company-tem lir, anungji parnoki gari lenmangji kong koma yanglutsüar meteta lir, anungji item ama company-temi yangluba lenmang nungbo lenmang teyangludak nunga gari tesenzüdakba lenmang nung lishi mesüra long agi gari ajanga mesüitetsüsa metoktsür aser parnoki lenmang yangluba yabo gari jajatetra ojang ta masü saka lenka aser lenküpbok ajaklen ayi, naro aser süngdonglidong tashi tema anepalutsür. Atangji, parnok ama kasa company-temi yangluba lenmangtem, talisa, Southeast Asia limatem nung yanglua angutsü. Item limatemjia asen lima ama tenem tekong agi sünga aliba limatem lir, anungji tenemtsünglen gari lenmang tudanga aodang, Nagaland nung inyakba amai masü, saka tuagi tenem kolaklen nungi wapetsa mityonga alubaji anentsü nungzüka malutsüsa lenmang tashi wapetsa alur aser lenmang renemer külen lenkümbanglenji ali akangkanga soittsü atema süngzü aser dera kanga junga sanga aoba ayi dena tema yutsütsü. Iba jagi lenmang nung jajartema tetsübu tarendak melii jajar aser alimaa topur jungdaktsür. Ajisüaka, kasa company-temisa inyaker ser nung, Nagaland nungbo Dimapur aser Kohima na tsünga dang masü saka tangar district-tem nunga National Highway ulushia lane 2 aser 4 kuma inyaker tem yagi tenem aser longruren ajanga aoba lenmang yangludang, mapa tenzükdang tetenzükbo tenemkolaklen nungi mita alua tenzüka sayutsü saka ayi aser süngdonglidong kar endoka merüktetterbo aluagi indangindanga tsüngdanga yutsür. Ano, tesem kar nungbo lenmang len aluagi mijang aturtemi inyakba ama tetsübuttsüka, tenem ajakji angümzüka alutsüsa arokpoka yutsür. Iba mapajibo süngdong tulu alendang aseni laodaktsülen laodaktsütsü asoshi süngkübok batsür amai lir. Iba jagi tenemlen nungi longji arangzüka alur aser ano alutsü. Tangbo tenem kolaklen nungi long kar nungzüka aluba dang lir saka kenlirbo tenem kolaki anir tenem ajungaji süngdong laoar amai laoa anembangtsü. Aji oda, tang tashi nung Nagaland nung company-temi Highway yangluba mapang lenmang nung lishi yutsüba agi gari mejajateti akümba aser lishiji konger külen auyi apongba agi nübortem akoksaba tatalokba aika lir aser tanga atalokdagi. Ajisüaka, governor-bai khen-khen ola adokba dak alaka asenokibo ola madoker, kechiyong asenok ajak tanü chiyongtsübo angur aser ola adokyonga olaji shingaia mangashitsü, anungji amajok nung asar amai asenoki bilemer südi. Tanü asen lima nung ochimashi, teraksa aser tamajung aika atalokba ya nübortemi ola madokba ajanga lir. Aji oda, Nagaland nungbo lenmang mejungi yangluba anema ola adokra (complaint süra) lenmangji meyanglui dang sen agizüka agitsü mesüra tanga nung belena bener oa mashimashi yanglutsütsüa akok. Asen lima nungbo aji takoktsü ! Asen lima nungbo lenmang teyangludak nung mapa junga inyaker asü meinyaker ta reprangba ketdangser-a mali amato, pei inyaknüttsü inyakba angur. Iba jagi yakanü amato tenemlen nungi long arangzüka alutsüsa aliba tia jenjang dena masadang aser mereprangi nisungtem senzüdaktsür aser black topping aoba lenmangbo o matem dang raksar alir. Asenok gari raksatsüsa, totzü tali atsüktsüsa, motzü jenloktsütsüsa, lishi aser auyi agi mesenzüttsüsa, ali agi anenbangtsüsa aser long agi onseta asütsüsa lenmang yanglurtemi atongtsür saka asenok pelaa dang lir. Asenok ya tesungmangtsü matumalem sen agi pei tata shilem, aküm aser tarutsü chinurtem meyang pututem dena yoka chitsür pilatsü purtem asü mesüra shirnok asütsü ?

OLEMSABANG OTZÜ ANGATETRA MAJANGSHIR?

~ S.Nuken Longkumer, Naga United Dimapur

Q. Lisem nung tzü inoktsüba ama otzü züluri aymtenba aser jembiba ola mesüker?? Tanü takok tashi Aortemibo Tir Yimyim bushia zügang tetsür tepur tajung angudang penlaba ama, Tir Yimyim angudang penlaba aser jangratemtsü onsara!! Anosotsü tajung den chiyonger ama sobaliba aika ajurutsü, laishiba nung David-i tashi tulu Golat akokba ama asen dak tashi tulu aliba metetsü, tanü MLA 48 aliba District tem ta angashi dang süngmanger?? Saka Naga nunger atema otzü tasen ka ama shisatetogo!! Ano 1974 küm nungi foothill road tenzüka ta angudang ni kanga penlaseta ajep?? Ya shirnoki zülü bushitet tenüngsang tulu agütsür, ali telung nung Hon ama liasü aji dang masü ABAM-i lakh 40 shi tenla agütsüogo, ibajia nüpurtemi angateter tenla meranga agütsüba nungi agiteta tenla agütsüba temoatsü mapa tajung asoshi kanga penlaseter!! 1974 nung foothills leman tenzüker tanü 2020 küm tashi Assam ajanga jajar ano küm kwika jajatsü?? Alimai jembir kar takumbo otzü dang atonga kazür mapabo mali ta jembir!! Otzü jembir ali nung dang alima yanglur! Mapa tuluba inyakang o ishiba jembiang? Aji shidak, saka Tsüngremi meimchir kusabo meyanglu?? Yamaji Tsüngremi tetsübok nung takar tulus akümstü kar tang yanglu! Nenok sülen sensaker anidaker anungji nenok MLA, Minister akümbaji sensakeri yanglutsüba masü na?? joko tanü tashitemetet lima nung ota petinu nung leman yanglutsü renemdarji!! Senokbo ali nung car jajatsü leman yanglutsü makoker asateper?? Kechib??

Ans: Tulusrem nenoki tejashima, alima aser nüpurtem yaritsü aruba rongsen kar nenok RCC nung inoksemadok?? Kar asaya balala nung indok!! Koda sür car leman yanglutetsü?? Tejashitsü olura Naga nunger aser sensakertem?? Yamai dang aotsü südi anosa cement yangluba mapa, paper mill, sugar mill Naga nunger meyang sama?? Tarutsü nükla kechi lir??

Tarutsü nükla aika lir saka tanü nungi tenzüksü tim! Tanü PM Modibai Naga nunger meima bilemba ya sentirongsen ama bilemtetang pa ya India sensaker meimba chuba ka lir. pa mapang nung Naga lima car leman tangar lima ama yanglutsütsü sarasadema atatsüla!

Q:- Meimchir karbo mapa mali tangar otzü dang zülur ta ashibaji tai asütsü tenükmerem tapu aika lir, Kaine tenu Abel tepset tenükmerem nungi tenzüka alima asü nung tenükmerem tete alitsü?? saka tenükmerem ajanga alimaji telungi alutsü?? Iba den ali rongsen samadaktsür, alima rongjena akümer?? Tir Yimyim ajanga alima atalokba aser sobaliba otzütem pei oshi nung jangratema bener arudaktsür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Indonesia nung Arogoi tzümetsüng lendong agi kongshirtem yarir



Kalimantan province, Indonesia nung Arogo volunteers-i rong nung chiyungtsü lema senzüba noksa nung angur.

Jakarta, February 03 (Agencies): Tawa tzümetsüng agi South Kalimantan province kongshiba sülen Indonesia nung Arogoi yariba agency temi taküm March ita tashi iba lendong agi kongshirtem nem teyari agütsütsü, ta metetdaksü.

Tzümetsüng lendong atalokba sülen tang Indonesia nung ki aika tzü agi mobanga lir aser nisung meyrjang aika shelters homes nung jenoka lir. South Kalimantan emergency coordination office osang ajanga ashiba agi, January 15 nü iba tzümetsüng lendong agi povince nung aliba district 14 nungi district 11 kongshia liasü, nisung 24 asü

aser nisung 700,000 dak tema timtemdar. Iba lendong atalokba sülen nisung aikati mining aser palm oil company tem nem tai tongloktsüogo; arem tulu chirepba agi iba lendong atalok, ta shia item company nem tai tongloktsür.

Iba lendong atalokba sülen February 3 tashi nung nisung 9,000 dak tema refugee tesemtem nung lir, aser taruba ita trok tashi parnoki teyari nüngdaksü.

Arogoi yariba agencies-Kalimantan aser Caritas Indonesia (Karina)-i Banjarmasin nung aliba Holy Family Tenla kima moapu nung joka ka den aid post amenoker teyari balala

agütsüdar.

Banjarmasin Diocese nungi Caritas Director, Francis Xavier Rudy Djong-i, "January 16 nungi tenzüka onoki takoksa angurtem nem teyari agütsüdar, ajisüaka March ita tashi maneni teyari agütsütsüsa akümtsü," ta metetdaksü.

Pai ashiba agi, Caritas teloki district trok kübok tesem 80 nung takoksa angurtem nem chiyungtsü, süoshi, blankets, tzü aser mozü lema agütsüogo.

Caritas Indonesia nung coordinator, Dhion Gumilang-ia, March ita tatembanglen tashi parnoki takoksa angurtem nem teyari agütsütsü, ta metetdaksü.

Congo linük nung Khristantem aika tepsetogo: Open Doors

February 03, 2021: Congo linük nung Islamic kiralongrar telok kati Khristantem timba ser nisung 100 dak tema tepsetogo, ta persecution watchdog Open Doors-i metetdaksü.

Islamic kiralongrar telok-Allied Democratic Forces-i Khristan nütsüng timba aliba linük, Congo nung tatalokba asem nung nisung 100 dak tema tepsetogo.

January 14, 2021 nü Ituri province nung Islamic kiralongrartemi Pygmy lisopur 46 shi tepset. ADF telok yagi mapang shia Khristantem amaker, puer aoer aser tepseter, parnokisa kiralongrartem nem training agütsüba sülen Africa nung aliba linük balala dangi kiralongrartem yoker, ta kasa osang ajanga metetdaksü.

Pygmy nunger million tesadang shibo reshikangshi jenjang nung lir, ta Open Doors-i ashi.

January 4, 2021 nüa

kiralongrartemi North Kivu province nung Beni region kübok Mwenda yim amakdang nisung 22 shi tepseta liasü.

Allied Democratic Forces kiralongrar telok ya Uganda nung amenoka lir aser kasa anogo nungjisa parnoki Tingwe yimdak nunga nisung 24 shi tepseta liasü.

Yaküm December ita tatembanglen-a Mwenda yim anasa aliba yimtsüng kar nung parnoki yimdaklir 17 tepseta liasü.

Beni region nunga asürtemji timbaka Khristantem liasü.

Open Doors otongdar, Illia Djadi-i, "Iba ya Islamic yimli ulutsü nükjidong nung inyaker. Central Sahel region balala nunga tanga telok balalai kasa nükjidong nung inyaker, item

rongnung northeast Nigeria nung Boko Haram telok densema lir. Parnoki region nung 'caliphate' amenoktsü meranger, aser parnok ajak

inyakyim kasa dang lir. Item tatalokba ajanga tai maket nisungtem kanga timtemer," ta metetdaksü.

Yaküm November 20 nungi December 3 tsüngda nunga Allied Democratic Forces teloki North Kivu province kübok Baeti yim amakdang nisung 18 tepset, Tenla ki den ki aika rongdoktsü aser tetsür 10 tashiyim amshia raksaja liasü, ta Barnabas Fund-i metetdaksü.

Allied Democratic Forces ya 1996 küm telungpur telok balala senteper tenteta liasü.

ADF teloki official süa Islamic State kiralongrar telok nungbo maden. IS teloki Congo linük ya 'Central Africa Province of the caliphate' ta ajar.

Alima nung Khristantem tamajungtiba reshikangshiba linüktem tarensen nung Congo linük ya jenjang 40buba nung lir (Open Doors World Watch List 2021).

ANOGO ABEN TSÜNGREM DEN

Item nung shisadangang

Filipi 4:8

Ne temang anema alitsü atema inyaksangshi asüba ama ne mulungjanga inyaksangshi asütsüla. Ne temang anema alitsü asoshi nai temang nung kechi inoker kümdanga inoktsüla, aser nai maneni inyaksangshi asütsüla. Ne tebilemba temerük alitsü atema nai kechi bilemer kümdanga bilemtsüla. Ne mulung inyaksangshi asütsü atema kechi tamaren aser kechi ochi lir iba nung shisadangtsüla. Iba jagi ne mulungjang sadema kümdaktsür.

Khristan kari parnok mulungjang memeshiba agi süngdaktsütsü alima dang melar. Kari tamajung nung shisadanger, ajak tamajung ama bilemer. Kari tamachi süa bilemba nung temulung süa alir. Kari Laishibaji parnoki bilemba ama ayur. Aji saka karibo pa mulungjang Tsüngrem ochiba nem lapoktsür- kechi ochi, tamaren, temerük, temeimtsü aser tajung.

Ne mulungjang nung nai kechi lidaktsür ibaji ne taküm aliba yimya jagi jungkai adokdaksür. Nai tamajung nung ranglokra na tamajung nübu ka asütsü. Nai ne mulung memeshiba agi süngdaktsüra ne taküm nung memeshiba alitsü. Nai ne mulung Khrista tebilembatem agi süngdaktsüra, na Khrista mesüka akümtsü.

Kechi agi ne mulung süngdaktsütsü ibai nai shimba dak aket. Tsüngrem ochibatem nung shisadangtsü shimtetang aser item jagi ne dak tamaren jakla adokdaksütsü koba agi Tsüngrem sentsüwangshidaktsür.

Madhya Pradesh nung pastor asem pua tepuokdak yuogo

February 03, 2021: January kümdar.

27, 2021 nü Madhya Pradesh state kübok Balaghat district nung Khristan pastor asem pua tepuokdak yuogo; parnoki kangshia tangar Khristan yimsü dangi meyipdaksür, ta parnok nem tai tonglokja apu.

Osang angazükba agi, Hindu nunger telok kati pastor asemji densema Khristan trok dak azükba sülen parnok ajak police station-i anir oa liasü.

January 27, 2021 nü Bagoli yimdak Pastor Mahendra, Pastor Chatter Singh aser Pastor Nathan nunger den Khristan asem sarasademtsü atema Khristan kibong ka kidang sentepa liasü. Sarasadem sentong tenzükli Hindu yimsü alia amanger nisung 30 shia arua parnok dak azükba sülen police station-i anir ao.

Police station atongba sülen Hindu nunger jagi, Pastor Mahendra, Pastor Chatter Singh aser Pastor Nathan nungeri Madhya Pradesh nung anti-conversion ozüng tasenba anema inyakogo ta aija tepuokdak ayu. Tanüngba Khristan asemjibo chiokogo.

Tawa Madhya Pradesh nung anti-conversion ozüng tasen ka agizükba sülen Hindi yimsü alia amangertemi Khristantem anema inyakba kanga bulua


International Christian Concern (ICC) den jembidang pastor Lanjwar-i, "State nung yipru agi kongshi ama tang tensa ka lir. Aputsü mesüra amaktsü tsübuba agi yimtsüngtem aika nung Tenla kitem shibangogo," ta ashi.

Lower courts nung pastor asemji chiokang ta bail temepishiba agütsü saka magizükba agi maneni High Court nunga kasa temepishiba agüja lir.

"Yimdak atalokba aser pastor tem anema police matsüngdang ken o benokba na tesendaktep kecha mali. Ajisüaka pastor tem nem bail magütsü; iba tetezü pastor asem jail nung ayutsü atema ajak (Hindu yimsü alia amangertem aser police) bangjemer inyaka ta angateter," ta yimdaklir kati metetdaksü.

January 9 nü Madhya Pradesh state sorkari anti-conversion ozüng tasen ka benoka liasü, aser iba ya India nungbo anti-conversion ozüngtem rongnung tesashiba lir. Iba ozüng kübok nisung ka tamangba yimsü meyiptsü atema state sorkar dang tama asüngdangtsüla aser kangshia tamangba yimsü meyipdaksübaji ozüng alema lir.

OLONG PAITEP # 5714



TIPIEN

2. Sü jeplok - (4)
 4. O agi merenshi - (5)
 7. Ayongküm li - (5)
 8. Chiyungtsü mapang süiadok - (4)
 9. Tsüngrem den jembiba - (9)
 12. Saklok - (4)
 14. Samaba mebushitet - (5)
 15. Mejanga onü - (5)
 16. Tzü shiruru ka - (4)

LANGTSÜNGLEN

1. _ _ _ _ i - (4)
 3. Kasa masü - (6)
 5. Nüchi masü - (5)
 6. Tashi endok - (5)
 9. Langtem - (5)
 10. Anü malidang - (6)
 11. _ _ _ _ kibur - (5)
 13. Tebur tembar tsüngda - (5)
 jatepba - (4)

OLONG PAITEP # 5713 TELANGZÜBA

TIPIEN :

1. Semtu, 3. Lepko, 5. Bilem, 8. Ulu,
 10. Tsüngpang, 11. Tesangwa,
 13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong, 6. Lungkak,
 7. Milak, 9. Zünga, 10. Temopu,
 12. Walu, 14. Ali.

Agüja aliba noksa nung meputepi
aliba 10 bushiang

TANÜBO NAI LANGZÜANG

Q. LongOps project ya UK aser ____ tsüngda lir.

- A. Japan B. USA C. China D. Europe

===== (Taruba adok nung onoki langzütsü)

YASHI ADOK TELANGZÜBA : 18th century



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymyim@gmail.com nung yokang mesüra Tir Yimyim bureau tem nung agüjang.

Tepela
Tasoba Anogo



1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?

ALIMA NUNG TEPOR TAJUNG TIBA
TETSÜRTEM: JANUARY 2021

(Yashi adok nungi...)

33. Carmen Soo
 34. Meagan Good
 35. Irina Shayk
 36. Gigi Hadid
 37. Kim Kardashian
 38. Kendall Jenner
 39. Eva Mendes
 40. Emily Blunt
 41. Nina Dobrev
 42. Kate Upton
 43. Cara Delevingne
 44. Olivia Wilde
 45. Alexandra Daddario
 46. Isla Fisher
 47. Ashley Graham
 48. Rihanna
 49. Lin Chi-Ling
 50. Charlotte McKinney
 51. Jourdan Dunn

SUDOKU # 5755

5				4	8	2		6	5	6	3	1	7	4	9	2	8
8	7	2	1	3	6				8	1	7	6	2	9	5	4	3
1	6	4							9	4	2	8	3	5	6	7	1
9			2			4	6	1	4	2	6	7	9	1	8	3	5
6	4			1		7	2	5	3	7	9	5	4	8	2	1	6
7			6	5	4			3	1	5	8	3	6	2	7	9	4
3			4	6		1	8		7	8	5	2	1	3	4	6	9
2		5							6	9	1	4	5	7	3	8	2
		6		2	3				2	3	4	9	8	6	1	5	7

TELANGZÜBA # 5754

OJANG LUTEP # 5302

- RIBKAO : [][][][][][]
 TKOAMAK : [][][][][][][]
 SÜRMEA : [][][][][][][]
 SÜMAK : [][][][][][]
 REMMA : [][][][][][]
 ESÜPTMBA : [][][][][][][][]
 UNGTCHIYSÜ : [][][][][][][][][]
 EMCHIAJA : [][][][][][][][]
 KÜTAM : [][][][][][]
 KSARAR : [][][][][][][]

OJANG LUTEP TELANGZÜBA # 5301

ALIMA NUNG AIKATI MEBILEMDANGI INYAKSAR
 SÜLEN TESÜ NUNGANG SASAA BILEMTETER

TAN HOPTA ATEMA - KOMA SÜLA ?

Q. Nagaland nung COVID-19 vaccine ya taginür ajak nem angati agütsü nunga koma süla ?

Olong 20 shi nung February 05, 2021 tashi nung iba telangzüba ya onok dangi (e-mail - tirymyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tirymyim.in) ajanga yokang. Telangzübatemji taruba Honibarnü adoktsütsü.



New Delhi, February 03, 2021: Bodhbarnü New Delhi nung GOBARDHAN indang portal tasen ka tenzükba sentong nung Union Minister for Agriculture & Farmers Welfare, Rural Development & Panchayati Raj, Food Processing Industries, Narendra Singh Tomar, Union Minister for Jal Shakti, Gajendra Singh Shekhawat, Union Minister for Fisheries, Animal Husbandry & Dairying, Giriraj Singh, Union Minister for Petroleum & Natural Gas and Steel, Dharmendra Pradhan aser Minister of State for Jal Shakti & Social Justice & Empowerment, Rattan Lal Kataria nunger adenba noksa nung angur.

UK Parliament nung India nunger aluyimertem onük jembitsü

New Delhi, February 03 (Agencies): Bodhbarnü Labour Party MP, Claudia Webbe-i, UK Parliament nung India nunger aluyimertemi longkak aitba onük süoka jembitsü, kechiyong parnoki tenzükba online petition nung nisung 100,000 dak temai sign süogo, ta metetdaksü.

Online petition nungji nisung 100,000-i sign asüba ajanga UK Parliament nung iba onük nung o tokteptsü temsüa kümogo.

Bodhbarnü Webbe-i twitter ajanga, "Onoki iba onük ya Parliament nung benoktsü. Iba petition nung nisung 100,000-i sign süogo anungji Parliament nung iba onük benoka o tokteptsü atema temsüa kümogo," ta metetdaksü.

Online Petition nungjaji "Urge the Indian government to ensure safety of protestors &

press freedom" lir.

Online petition nungji yamai shia lir, "Aluyimertemi longkak aitba aser osangbenertem temeden dak sendakba nung sorkari sangdong ka agütsütsüla. India ya alima nung democracy tulutiba lir, aser osangbenertem temedenji fundamental temeden lir."

Petition nung sign asüba tsünglanglenji yamai zülua lir, "Iba onük nung o tokteptsü atema Parliament-i agizüktsü. Sign asürtem 100,000 tema jungra Parliament nung o tokteptsü temsüa lir. Iba onük nung o tokteptsü atema anogo shimtsü asoshi anogo ka den tajemba agitsü."

UK parliament matsüngdang benokba petition ji nisung ka tenüng agi, Gurcharan Singh-i tenzükba liasü aser Bodhbhar nikongdang tashi nung iba

petition nung nisung 1,03,350-i sign süogo. Iba petition ya December 17, 2020 nü UK parliament indang official site nung tenzükba liasü.

February 2 nü nüngtugu kentener, Rihanna-i, kechiba shingaia India nung aluyimertemi longkak aitba indang mejembir, ta asüngdanga liasü.

Lai twitter ajanga India sorkari aluyimertem longkak aitba tesem nung internet services anentsüba aser Delhi nung longkak aitba tesemtem nung tenokdangbatem aliba indang osang ka lemsatepa liasü.

February 3 nü nüngtugu climate activist, Greta Thunberg-ia kasa osangji lemsatepa twitter ajanga, "India nung aluyimertemi longkak aibaji onoki pusemer," ta lemsatepa liasü.

Feb. 6 nungi public atema Rashtrapati Bhavan lapoktsütsü

New Delhi, February 03 (Agencies): February 6 nungi public atema Rashtrapati Bhavan tanaben lapoktsütsü; coronavirus wara aliba ajanga March 13, 2020 nungi tenzükba tesüiba ita 11 jungnüa Rashtrapati Bhavan shibanga liasü.

Sorkar sodi anogotem dak alaka Honibar aser Amongnü anogotem nung Rashtrapati Bhavan lapoktsü, anungji semdangnertemi website <https://presidentofindia.nic.in> mesüra

h t t p s : / / registration sen 50 agitsü. Nisung menungteptsü atema 10.30 ako, 12.30 ako aser nikongdang 2.30 ako nung semdangsü asoshi jelia mekazüktsüla; khi nungi nisung 25 dang melatsü, ta sangdong nung shia lir.

Rashtrapati Bhavan sangdong ajanga, "Coronavirus wara aliba agi March 13, 2020 nungi tenzükba Rashtrapati Bhavan shibanga liasü, saka public atema taruba Honibar, February 6, 2021 nungi tanaben lapoktsütsü," ta metetdaksü.

Tamalen ama Rashtrapati Bhavan semdang shia dang

registration sen 50 agitsü. Nisung menungteptsü atema 10.30 ako, 12.30 ako aser nikongdang 2.30 ako nung semdangsü asoshi jelia mekazüktsüla; khi nungi nisung 25 dang melatsü, ta sangdong nung shia lir.

Rashtrapati Bhavan semdangba mapang nung coronavirus dak sendakba telatetbatem ajak benshitsüla, item rongnung mask agiba aser tangar anasa maoba densema lir.



February 03, 2021 nü New Delhi nung aliba Mandi House nung aluyimertemi yimiyim ayima longkak aitdang security sepaitemi parnok nokdangba noksa nung angur.

Parliament nung opposition-i aluyimba ozüngtem agientsü ahang

New Delhi, February 03 (Agencies): Bodhbarnü Rajya Sabha nung Opposition lenir, Ghulam Nabi Azad-i Ato kilonser, Narendra Modi dang aluyimba ozüng tasen asem agienang ta mepishi, aser ibaji opposition party balalai pusema liasü.

Congress lenir, Azad-i, "British hungeri yimsüsüba mapang nung parnokia aluyimba dak sendakba ozüng ka agiena liasü," ta ashi.

Rajya Sabha nung Aam Aadmi Party (AAP) züngsem asemani maneni yimiyim ayimba agi Chairman-i senden nung meinzüka yoka liasü.

Rajya Sabha nung Question Hour anogo ananü magitsü lemtet aser senden nung aluyimertemi longkak aitba onük nung o lemtepa liasü.

Mongolbarnüa Parliament House anaprong nung opposition party temi aluyimertem onük nung sorkar anema longkak aitba agi senden thinena liasü.

Bodhbarnüa Lok Sabha nung aluyimertem onük nung rongrong adokba agi aonung 7:00 ako tashi senden thinen.

Rajya Sabha nung BJD MP,

Dr Sasmit Patra-i Women's Reservation Bill agizüktsü atema benokdang lai, India nung tetsürtem nem tashi agütsütsüji kanga tongtibang, talisa rongsenkettsüng, loktiliba aser yimtenren tsütsü tetsürtem nem tashi agütsütsüla, ta metetdaksü.

Lok Sabha senden aiben thinenba sülen Congress MP, Shashi Tharoor-i twitter ajanga, "Nenoki (sorkar) senden melinüra kechiba Parliament alitsü. Sorkar aser Speaker-i aluyimertemi longkak aitba onük nung o lemteptsü memelungba ya ni magizükter. Tongtibang onüktem nung nüburtemi shimtetba züngsemtemi tebilemba lemsateptsü atema Parliament tenzük," ta metetdaksü.

Tharoor-isa, "O tokteptsü melara MP temi nüburtem, aluyimertem tebilemstü lemsateptsü aser iba tebilemstü koktettsü atema tebilemba lemsateptsü, ajisüaka sorkari tekong meranga opposition-i o lemteptsü mepishiba magizüker, kechiyong parnoki aluyimertemi ahangba magizüker. Iba ya democratic masü," ta metetdaksü.



Bengaluru, February 03, 2021: Bodhbarnü Bengaluru nung aliba Yelahanka air base nung Aero India 2021 semzükba sentong nung Union Defence Minister, Rajnath Singh-i tejaokertem dak teka ayiploksüba noksa nung angur.

Aluyimba ozüng agientsü atema October tashi mapang agütsür: Tikait

Jind (Haryana), February 03 (Agencies): Bodhbarnü Bhartiya Kisan Union lenir, Rakesh Tikat-i, aluyimertemi aluyimba ozüng tasen asem agienang, ta ahangba melen Modi sorkar dang anenang, ta takhangba agütsü nunga koma süla, ta asüngdang.

Haryana nung Jind district kübok Kandela yimdak aluyimertem lokti senden nung jembidang pai, "Tang asenoki Centre sorkar dang aluyimba ozüng asem agienang ta akhangar. Asenoki sorkar dang Delhi nung yimsüsüba menden tokjang, ta akhang nungbo koma süla?," ta asüngdang.

Iba senden nung kin aser lokti tentet 50 jungnüa aden.

BKU lenirisa, Centre sorkari kanga kümdangsü mapang tongogo, kechiyong aluyimertem yaküm November 26 nungi

Delhi arrtsülen longkak aita arudar, ta ashi.

"Aluyimertemi ahangba agizüktsü atema sorkar nem October ita tashi mapang agütsür. Sorkari takhangba magizükra tractor lakh 44 bener aluyimertemi longkak aittsü," ta paisa metetdaksü.

Iba senden nung bangzüng pongu renema liasü, item rongnung aluyimba ozüng tasen asemprong agientsü, minimum support price (MSP) indang ozüng ka yanglutsü aser Swaminathan Committee-i benokba mapa küma inyaktüsü densema lir.

Parnokisa January 26 nü Delhi nung aluyimertem tractor rally agiba sülen samaba aluyimertem ajak bushitsü aser aluyimertem anema benoka aliba ken otem ajak agientsü takhangba agütsü.



Japan nung aliba Burma nungertem aser parnok busemertemi Tokyo nung aliba Foreign Ministry jakdang longkak aita jajaba mapang tangokba noksa ka yangi angur. Hombarnü mitkar tashi amshia Myanmar sorkar atsüngdokba sülen amenokba mitkar sorkari taoba küm election nung ashikülak mapa inyakba bushisüngdangtsü aser ano COVID-19 tashidak wara aser rongsenketsüng anepalutsü, ta Myanmar indang lenir taseni ashi.

Myanmar police-i Aung San Suu Kyi anema ken o benok

Naypyidaw, Tsüklai/February 03 (Agencies): Yimsüsüba menden nungi atsüngdoker alila Aung San Suu Kyi-i özüng alema osangtsüsang agiba osettem bendanglen nungi bener aruba atema Myanmar police-i ken o benokogo aser asüngdangyatsü atema la ya February 15 tashi pua ayutsü, ta police indang document ka ajanga ashi.

Hombarnü mitkartemi tashi amshia sorkar atsüngdoker Nobel Peace sempet angur Suu Kyi aser danga civilian yimten yimsüsürtem apuba sülen iba mera ya agir. Sorkar melenba ajanga Myanmar nung mapang talangka nungi democracy dangi melentsü inyaktepa aruba tembangdaksür aser iba yongji United States aser danga anüolen linüktemi aitsür.

Police temi arishi küm 75 tain Suu Kyi anema okadak ken o benokba nung, linük yimtiba Naypyidaw nung lar ki mita bushiba mapang walkie-talkie

radio trok ngutet, ta shia lir. Item radio ya özüng alema bendanglen nungi bener aru aser temelaba melie amshi, ta ashi.

Kuli tejangja busitsü atema Suu Kyi ya mechioktsüla, ta police temi Bodhbarnü ashi.

Ano document danga ka nung police temi tir menden nungi atsüngdoker alisang Win Myint anema ken o benoka lir. Tir Win Myint-i taoba küm November ita election mechi coronavirus prokshia aoba nungi nokdangtsü atema totuyuba agüja aliba nung aibelen, ta police temi aitsür.

Suu Kyi'er National League for Democracy (NLD) teloki election nung kanga junga takok ngutet saka mitkartemi iba election nung ashikülak mapa inyaka lir ta aija sorkar atsüngdok.

ASEAN (Association of Southeast Asian Nations) Parliamentarians for Human Rights indang mendenpuba, Charles Santiago-i item taitsüba

ya tamaji mapa ka lir, ta ashi.

"Mitkartemi özüng alema tashi agiba ya tim yimya ka ama kumdaktsütsü mechi teshisadangba makai mera agiba lir," ta pai sangdong ka nung ashi.

Suu Kyi-i lar linük nung democracy movement anir nokdakba mechi 1989 aser 2010 tsüngta küm 15 shi la kidang shibanga ayu, saka 2017 küm Muslim Rohingya refugee dak sendakba nung alimai matsüngdak la tenüing menükaka lar linük nungbo la ya kanga nüngtugu lir.

Civil disobedience campaign nung shilem ka ama nütüsing yongsük million 54 aliba linük nung sorkar indang mozüki nung inyakerktemi mapa inyakba anenogo aser kari ribbon sentsü temerem agir.

Iba sentong nung jila 30 nung aliba mozüki 70 nung inyaker doctor tem dena lir, ta tang tasen tentetba Myanmar Civil Disobedience Movement ajanga ashir.

Italy tiri Draghi dang sorkar tentettsü ashir

Rome, Tsüklai/February 03 (Agencies): Coronavirus aser rongsenketsüng timtem nungi linük anitettsü atema Italy Tir Sergio Mattarella-i taoba European Central Bank tekolakba, Mario Draghi dang sorkar ka tentettsü atema Bodhbarnü ashi.

Draghi-i telemsa agi sünga aliba parliament nung nübu ayongtsü merangtsüla, saka political party kari technocrat kati aniba sorkar busemstü nungnanga bilemer.

Ato Kilonser Giuseppe Conte'er teloktep sorkar kumzüksü meranga jembiaka takok monguteti aloba sülen Mattarella-i iba mera ya agir kong pa atema lenmang ana dang lir - yakta election agitsü mesüra Italy nung timtem koktettsü atema technocrat sorkar ka tentettsü.

Coronavirus tashidak wara agi linük ajunga sünger lia election agitsü ya shisa maka mapa ka lir, ta tiri ashi aser administration tasen kati


tekeratiba nung sorkar tentettsüla, aser aji meinyaktetra rongsenketsüng nung timtema aliba yaritsü atema European Union-i yangluba senotsü teyari sen billion \$243 dak tema mangutsü, ta ashir.

Ajisüaka nüburtemi akhumtsübu züngshia alisang Draghi-i sorkar tentettsüa nübu bushitettsü atema teimla magütsüteter, kechiaser parliament nung party tulutiba, 5-Star Movement ajanga pa meyaritsü, ta shiogo.

2012 küm euro zone laotsüsa tensa ka nungi anitetba atema Draghi tenüing tushir.

2019 küm ECB kümsük tembangba sülen nüburtemi pa aiben mangu, saka health aser economic emergency den yimtenren tsütsü mangatetep meyokteper yipru tesashi aonba mapang pa tenüing ya temai adoker.

Italy nung coronavirus tashidak agi nisung 89,000 dak tema süogo.



Callao, Peru nung oxygen tank refill asüba dokan ka kima Alejandro Ccasa anogo asem tashi atar oxygen tank tazüngtem anasa sarasademba noksa nung angur. Ccasa tebutanubu dak COVID-19 tashidak keta lir aser par kidang oxygen tank tulu ka dang lir aser ajiaki oxygen therapy ghonda pezü shi agütsür, ta pai ashi.

Kremlin anemsang Alexie Navalny tepuokdaki yoker

Moscow, Tsüklai/February 03 (Agencies): Mongulbarnü Russia nung aliba court kati anüolen linük senzüka yutsür Alexei Navalny tepuokdak ayutsü obendang agütsü, aser iba obendang ya Tir Vladimir Putin-i pa sempaba aser tsüpuba agi lir, ta tenüing asener.

Moscow court ajanga Navalny tepuokdak küm asem ser tesadang ayutsü obendang agütsü, saka pa tepuokdak küm ana ser ita ti dang alitsü, kechiaser pa house shibanga/ pua ayuba mapang azüngtsü, ta pa indang okatsüri ashi.

Parnoki iba obendang ya jembishitsü atema ken o benokshitsü, ta ashir.

Iba telemtetba ya ajanga anüolen linük den tesendaktep tamajungba akumtsü, kechiaser iba ken o mechi Russia nem tenokdangba kar agütsütsü jembiba mapang lir. Külen Russia linük tesem ajungalen nüburtemi Navalny chioktsü takhangba agüja longkak aiter.

United States, Britain, Germany aser EU linüktemi

Moscow dang tekeratiba nung Navalny chioktsüla, ta ajungshir.

Russia nem anüolen linüktemi tenokdangba balala agüja lir, anungji iba dak tali agütsütsü lenmang sadema mali, ta asadangteter. Navalny tembar kati anüolen linüktem dang iba ken o mejembidang Putin den yariteper nem tenokdangba agütsütsü ajungshia liasü.

Russia-i Navalny ya CIA atema inyaker ka lir ta ashir aser anüolen linüktem dang par linük telungzük inyakyim nungi pila alitsü shiogo.

Navalny ya military-grade nerve agent miim amshiba nungi taneptsü ngua Germany nung munger meyipa shilangba mapang khen atema tepuokdak nungi chiokba özüng nung alibelenba atema tai tonglokja January 17 nung apu.

Russian state security agent temi miim mozü ya pa indang underpants nung inoktsü, ta Navalny-i ashir, koba Kremlin-i magizük. Mongulbarnü okadak

pai Putin aitsütsü meranga liasü.

"Putin inyakyim ajak agi nisung tepsettsüba dang lir. Ajisüaka pa ya yimten yimsüsür tajung ka ama sayur, pa puti otsü nung miim amshir ka ama züngshitsü. Alexander the Liberator liasü, Yaroslav the Wise liasü aser Putin the Underwear Poisoner alitsü," ta Navalny-i ashi.

Riot police tem renema liaka iba obendang angashiba sülen pa busemertemi nüburttem dang central Moscow nung adenshitsü ajungshi. Moscow metro ajanga central station asem shibang.

Osangbener temi longkak aiter nisung noklang aika nguogo aser police temi kar tashiyim amshia apu. Longkak aiter kari "Putin ya auer!" aser "Putin ya miim amshir ka!" ta ayimtena liasü.

Mongulbarnep court kima riot police temi Navalny busemer nisung 70 shi apu. Mongulbarnü linük tesem balala nung nisung 1,408 puogo aser item rongnung nisung 1,000 shi

Moscow kisüing nung apuba alitsü.

Pa apuba sülen Navalny-i YouTube video ka prokshi, kong pai Putin rongsen indang jembi, koba million 100 dak temai iba video ya reprangogo. Kremlin-i ibai tiaziü ta ashir.

2014 küm rongsen meshidaki amshiba ken o ka nung thia-thia temerenshi agütsüba nung khen atema chiokba nung Navalny-i aibelenba atema Mongulbarnü ken o ya jembi liasü.

Navalny-i okadak o jembiba mapang, Putin-i pa yimtenren tsütsü tsükchir ka ama angatetba mechi tepuokdaki yoker, ta ashi.

Arishi küm 68 tain Putin-i 2000 küm nungi Russia yimtenren amokbanger arur aser taoba küm referendum ka ajanga constitution nung temelenshi kar inoksemba kübok pai 2036 tashi yimsü sütettsü.

"Nisung kari ni kü linük nung mera ka dang agitsüa memolunger. Aser asenoki aji shibar meteta lir aser kechiba

yamai inyaker'ar meteta lir - nisung kati sempaba aser tsüpuba, bunker ka nung lir, shibai ni tepsettsü merangba nungi jembuba ajanga temolung yiru," ta arishi küm 44 tain Navalny-i court dang glass cage ka telung nungi ashi.

Obendang zünga ashiba sülen pa kinungtsü Yulia-i coronavirus mechi inoka aliba mask agizük aser la kinungbu dang teka ayiploksü. Navalny-i "Shisa tebulu. Ajak jungadoktsü," ta ayimoktsü.

Putin-ibo Navalny dak miim amshiba ya pa tenüing menüktsütsü merangba tasak ka nung US-ia shilem agia lir, ta December ita ashir.

Navalny südaktsünüa ali asübo Moscow-i mapa renemer lila, ta Putin-i ashi.

Senotsü meshidaki amshiba ken o nung küm asem ser tesadang tepuokdak ayutsü obendang agütsüba nung aibelenba dak sendakba nung Moscow indang state prison authority ajanga ken o benoka Mongulbarnü ya jembi liasü.

NIIT Corporate Social Responsibility award agütsü



Dimapur, Tsüklai/February 3 (TYO): NIIT Dimapur center-i, CSR (Corporate Social Responsibility) atema award February 1 nü sangdongogo. Computer Applications atema angati Diploma asoshi applicant 90 nungi Public College of Commerce nung 4th semester kaketshir Saraswati Ghale-i takok ngua liasü.

Award agütsüba sentong nung Livingstone Foundation International School mendenbuba Dr. Andrew Ahato aser Director Peace Channel Dr. Fr. C. P Anto na alakteta jaoker liasü.

Sentong nung o jembiba mapang Dr. Ahato-i, NIIT Dimapur center nung mapang

Mon nung Childline Advisory Board senden amen

Dimapur, Tsüklai/February 3 (TYO): Mon Childline Advisory Board (CAB) senden ka February 2 nü DC Office, Conference Room, Mon Town nung DC Mon, Thavaseelan K, IAS lenisüba kübok agiogo.

Childline Mon ya National Programme nung shilem ka, koba 2020 küm August ita 24/7 Toll free no 1098 ajanga timtem nung aliba tanurtem nem teyari agütsütsü aser kümzüksü nükjidong nung amenok.

Timtem nung aliba osang angazükba sülen Childline team tem minute 60 tsüngda timtem ataloka aliba tesem tonga aoer. Ken o apir tanurtem ajangzüksü atema rehabilitation sentong agütsür aser maneni asadanga alir. Childline-i tanur arishi küm 0-18 tsüngda alirtem nem teyari agütsür aser ken o tulu nungbo küm 25 tashi nema teyari agütsür.

Mon Childline team-i, iba sentong inyakyim indang presentation ka agütsü aser iba sentong amenokba sülen takok angubatem indang lemsatep, kong tanur ka mezügmeshia amshiba ken o ka aser wara pokteter aliba mapang kibong 28 nongita yariba densema lir. Childline team-isa, line Department tem dang iba sentong takok asoshi akokba tashi yaritsü mepeshia metetdaksü. DC Mon-i, parnoki benokba ken o ajak angadangogo aser item ya bentettsü atema takok tashi teyari agütsütsü nangzük.

Iba senden nung department balala nungi ketdangsürtem aser Board züingsemtem dena liasü.

talangka bendanga agüja inyakba atema centre tekolakba Daniel Changkiri nem tenüngsang agütsü aser applicants tem dang IT professionals akümtsü atema meranga inyaksü ajungshi.

Nagaland nung lanurtem carrier yanglutsütsü atema centre nung inyakertemi bendanga agüja inyakba atema tenüngsang agütsüba den centre Managing Director Ajay Sethi-i, CSR inyakyimtem mapang

shia agiba atema tenüngsang agütsü.

Kasa mapang nung Dr. Fr. Anto-i, applicants tem dang NIIT Dimapur center-i mapangshia agütsüba maongkatem agütsü ajungshi.

NIIT Dimapur-i, mapangshia scholarship balala agüja arudar aser iba den post graduates careers programs atema Eduvanz den longjemer NIIT-i interest medeni loan tem agüja arudar.

Govt. of India (Ministry of Education) Department of Higher Education **Hinditar Bhashi Hindi Lekhak Puraskar Year-2020**

Central Directorate, Deptt. Of Higher Education, Ministry of Education kübok 'Hinditar Bhashi Hindi Lekhak PurPuraskar' atema 2020 asoshi application tem jaoker. Iba scheme kübok literature dak sendakba onük (otsü, sangro, Novel, julishi, Memoirs amala) nung aser tanga literature (regional culture, Fine Arts, History, Science & technology amala) nung ajemdaker Hindi oshi nung kakets (original) züluba aser India nung oshitem nungi Hindi agi meyipzükba literature tem atema küm nung sen lakh ka alang award 19 agütsütsü densema lir.

Temsüa alirtem:-

1. Iba scheme kübok shilem agir kakets zülurtem tetsü oshiji Hindi dak alia mashi oshi ka asütsüla.
2. Kakets zülur ya Hindi jembiba state nung küm 15 aser iba dak alia lidanger malitsüla.
3. 2015 nungi 2019 tashi nung toupak 100 dak tema keta aliba kakets zülur alibattem iba award atema asadangtsü.
4. Manuscript tem magizüktsü
5. Iba scheme kübok award agütsür alirtem tanaben masadangtsü
6. Central sorkar/State sorkar mashika/Undertakings mesera Commercial institution temi award agütsür aliba kakettes masadangtsü.
7. Central Hindi Directorate ketdangsürtem mesera parnok kinungertem iba scheme nung shilem magitetsü
8. Nisung mashi kati (kija, institution mesera publisher) kakets zülur tenüng nung kakets benoktetsü.
9. Kakets asadanga mapang CHD-i renemba standardized Devanagri script aser Hindi spelling tem amshiba dena asadangtsü
10. Inyakyim shidak beshia kakets pongu benoktsüla. Kakettes meyipa magütsütsü
11. Kakets zülur aser publisher tenüng keta aliba tapak intoker **kakets pongu nungi asem benoktsüla** aser iba ya tanaben alenshir alitsü nüngdaker. Tanungba kakets ana ya koma atok yamaji agütsütsüla. Application form Directorate website **www.chdpublication.mhrd.gov.in** nungi download sütetsü. Kakettes teküboklen agüja aliba address dangi post ajanga mesera tsüngtong aruru advertisement sangdongba anogo sülen anogo 60 tsüngda agütsütsüla.

**(Gandhari Pangtey)
Deptt. Director (Awards)
Central Hindi Directorate
West Block-7, R.K. Puram,
New Delhi-110066.
Phone:-011-26105211 Extn. 234/212**

diavp 21252/11/0008/2021

Mozüki ajak nung fire safety atema nodal office shimtsü tuyu

Dimapur, Tsüklai/February 3 (TYO): Kümtem tsüngdang mozükitem nung mi lendong atalokba aser nisung taküm dena samaba aser iba den Supreme court order writ petition (Civil) No 7 of 2020 dak ajemdaker state kübok Primary health centres nungi tenzüker jurila hospitals/nursing homes tashi sorkar mozükitem dang metetdaksür aliba ama tangsa tang fire safety Nodal officer shimtsü tetuyuba agütsüogo aser ketdangsür shimba osang Principal Director, Health and Family Welfare office nung February 20, 2021 matong tsüngda benoktsü metetdaksüogo. Health care unit tem nung item nodal officer tem yagi mi lendong dak sendakba inyakyimtem ajak achaayangtsü..

Joint director aser State

Nodal Officer for Fire safety, Dr C. Tetseo-i sangdong ka ajanga, state sorkari yakta ajak anidaksü atema tetuyuba ka agütsütsü aser certification atema Fire & Emergency Services Department ya nodal agency asütsü, ta metetdaksü.

Paisa, mozükitem National building code 2016 sülen anidaksü nüngdaker ta ashi. Maneni Dr C. Tetseo-isa, PHCs/CHCs amala public health care facilities ajak nung nisung ajak mi lendong nungi jemboa alitsü atema jenjang tapet agütsü nüngdaker, ta ashi. Deputy Chief Medical Officers, shirnok district jenjang nung Fire safety Nodla officer tem lir, parnok dang pei district nung item inyakyimtem benoktsü atema mozüki ajak den tongteprateptsü asoshi paisa metetdaksü.

Financial Literacy tesayurtem virtual/online training akatsü

Dimapur, Tsüklai/February 3 (TYO): Nagaland Board of School Education-i sangdong ka ajanga higher secondary schools tasentem atema Financial Literacy tesayurtem virtual/online training 2021 küm February tatemlen akatsü ta metetdaksüogo. Iba course atema tesayur tasen shimer aliba school tem nung course sayutsü asoshi tesayurtem training agütsü nüngdaker aser school tem dang February 15,

2021 matongtsüngda nbsense@gmail.com ajanga Board nem osang agütsütsü mepeshia metetdaksüogo. 2021 academic session atema Class IX asoshi Financial Literacy Course benoktsü jangraba high school temi nbsense@gmail.com ajanga Board nem February 15 matong tsüngda osang agütsütsü metetdaksüogo, ajita asünungdang tesayurtem nem iba course sayutsü atema training agütsütetsü.

MULUNG NEN O

ASO : 30.08.1947 - ASÜ : 24.01.2021
LATE. I. PANGILA (DIBUIA)

Temeim Oja, nabo Tsüngremi nungloksüba mapa ajak renemer Kibur dangi ogo, saka onok na mali tsüngdangpi-a konga rongjenseta akümüli koda lia aotsü ta shisabulur, onoki na kangasa menungrar.

Temeim ojala, iba lima nungi pilar, ozü molung zürep tia nung alidang kija kibong Arogo-yimten kiyonger, lokti tentet balalai sarasadem, rongsen, nubo agi yaritepogo nenok ajak dang ozü molung taroktiba agi kangasa pelaba iba sabang ajanga lemsateper, tebu Tsüngremi nenok mapa tajung maneni moajangma.

Temeim kinungbo, chirnur, semchirtem, anükapang.



MULUNG NEN O



13.06.1925 - 30.01.2021

Temeim obala asür **Sarepcha** Ex. Pastor (Süngratsü), shiranga aliba mapang nungi pa akümüli tembanga asüku mulungzürep ajak nung temeimbatem kija, kibong, arogo aser lokti balala shirnorkisa sarasadem, nübu, shisatsü aser rongsen agi mulungsoa temeim agi ozü kibong den yaritepa aruogo, nenok ajak dang kinungertemi kangasa pelaba iba osang kakets ajanga lemsateper.

Teyanglur Tsüngremi nenok ajak molamoshia moajangma ta ozü tamang sarasadem.

Temeim kinungtsü, chirnur, semchir aser kinungertem.

Bournemouth-i Manager Jason Tindall mapa nungi anentsü



Tsüklai/February 3, 2021

(Agencies): Bournemouth-i ita tenet dang lir manager Jason Tindall mapa nungi anentsüogo, ta Championship club-i Bodhbarnü metetdaksü.

Arishi küm 43 tain Tindall-i, taoba küm August ita Eddie Howe melen aser club den küm asem atema tenangzüktepba ka yanglu. 2019-20 season nung Bournemouth pur Premier League nungi relegate asüba

sülen Eddie-i club toktsü.

Bournemouth puri second-tier Championship nung asaya 27 nung point 42 nguteta jenjang trokbuba nung aliba mapang Tindall-i club toktsür. Par team-i taoba asaya pong nung pezü tashi makok, kong Mongolbarnü Sheffield pur 2-1 agi makokba densema lir.

"AFC Bournemouth aser manager Jason Tindall na tanü pilaogo. Iba telemetba agitsü

temela masü asü, kechiyong Jason-i asayar, assistant manager aser manager ama club atema bendanga agüja teyari agütsüogo," ta Bournemouth sangdong ka ajanga metetdaksü.

"Ajisiüka tawa club asayaba yimya aser result ya board-i imlaba dang nungi kanga agi tajemba. Nükjidong tongtetsü atema club nem takokba tashi maongka agütsütsü asoshi temelenshi nüngdaker ta bilemer," ta kasa sangdong ajanga metetdaksü.

Howe manager mapa inyakba mapang tepeyong Tindall ya pa indang assistant liasü aser Howe-i Burnley achaayangba mapanga Tindall pa indang assistant liasü.

Tindall mezüing asayar ka ama 1998 küm Bournemouth nung aden aser club tenüing nungi 199 ben asayaa liasü.

"Pa club-i kanga sakloker. Pai club jenjang tamajung nung aliba mapang asüingsashiba nung shilem tulu agiogo aser club-i kodanga majangtetba jenjang ajangetetogo," ta Bournemouth-i shisem.

Atlético forward Félix aser Madrid tir Pérez dak COVID-19 potet



João Félix



Florentino Pérez

Madrid, Tsüklai/February 3 (Agencies): Portugal forward João Félix dak coronavirus tashidak potetba Atltico Madrid-i Bodhbarnü metetdaksüogo.

Club sangdong ka ajanga ashiba agi, arishi küm 21 tain asayar tang kidang lokti nungi pila lir aser local health ketdangsürtem aser Spanish league indang COVID-19 protocol tetuyuba sülen anidaka inyaksangshidar.

Ajisiüka Atltico-i pa health dak sendakba nung osang tejangja magütsü.

Spanish league nung Atltico pur Barcelona aser Real Madrid dang nungi point 10 agi timba lir aser parnok asaya ka tejemba asayaa lir.

Atltico pur taruba asaya Celta Vigo den kidang Hombarnü asayatsü.

Champions League nunga parnok round of 16 mezüingbuba leg nung Chelsea den kidang February 23 nü asayatsü.

Kasa mapang nung Real Madrid tir Florentino Pérez dak coronavirus tashidak potetba club sangdong ka ajanga Mongolbarnü metetdaksü.

Madrid-i ashiba agi, arishi küm 73 tain Pérez dak tashidak keta aliba temaitsü kecha mesayur aser pa yimya ama tashidak tendangba mapang poteta liasü. Iba dak alia club-i tanga osang kecha magütsü.

Madrid coach Zinedine Zidane daka taoba ita coronavirus tashidak poteta liasü.

Alima nung linüktem rongnung coronavirus wara agi tamajungtiba kongshiba rongnung Spain-a densema lir.

Yarra Valley Classic: Barty & Osaka na quarter-i iogo



Tsüklai/February 3, 2021

(Agencies): Bodhbarnü Australian Open atema renemshiba asayamung ka nung Ash Barty-i mezüingbuba set nungbo world No. 1 asayar ama asayatet, ajisiüka tanungba set ana nung la kanga timtem, ajisiüka lai 6-0, 4-6, 6-3 agi No. 52-ranked Marie Bouzkova koka liasü.

Tasembuba set nung 2019 French Open champion yagi game ti buba nung Bouzkova indang serve break asü aser taruba game nung service winner ka yoka asaya akok.

"Yasüing asayaba sülen, ni kanga menoa mejangba nisung masü asünung yasüing junga memelang," ta Barty-i ashi.

"Asaya teyong nung ni terabo nongshi asaya... saka asaya akokba atema kanga

pelar," ta laisa ashi.

Barty quarterfinals nung America tsür Shelby Rogers den asayatsü.

Kasa asayamung nung U.S. Open champion Naomi Osaka-a quarter-i iogo ajisiüka laia set asem asayarang asaya akok.

Australian Open asayatsü aliba tesem nung hopta tepeyong mazüing asayatsü aser tanü asaya 89 asayatsü liasü. Hopta tsüingda WTA events asem aser ATP Cup densema teburtem tour asem asayatsü. Australian Open nung asayatsüpurtem ajak

anogo 14 quarantine asütsüsa akümba ajanga warmup asayamungtem ajak taküm atema mezüingbuba Grand Slam February 8 nungi 21 tashi masaya tsüingda hopta ka tsüingda asayatsüsa aküm.

Osaka mezüingbuba round bye angu aser tanabuba round nung lai game pezü dang mekoki liasü, anungji No. 371-ranked Katie Boulter 3-6, 6-3, 6-1 agi akokba ya laasoshi temelenshi ka liasü.

"Ni mapang talangka agi asayaner, kechiyong iba ajanga ni court jenjang tali jangjar aser ni tali tashitaiba akümba jangjar," ta Osaka-i ashi.

"Ni yashi mapang tatsüka dang asaya, anungji tanü ni kūsasa mapang talangka asayadaksü," ta lai ashi.

Maneni third-seeded Elina Svitolina-ia taoba former French Open champion Jelena Ostapenko 6-7 (4), 6-3, 6-2 agi akok aser seventh-seeded Elise Mertens-ia No. 12-seeded Caroline Garcia 7-6 (1), 6-3 agi koka liasü.

CA-i IPL nung asayatsüpur nem NOC agütsütsü

Melbourne, Tsüklai/February 3 (Agencies): Cricket Australia-i Bodhbarnü ashiba agi, Indian Premier League nung asayatsüpurtem nem "case-by-case" basis nung No Objection Certificates agütsütsü, ta shiogo. COVID-19 tashidak asendenshir prokshia aoba ajanga national team South Africa nung oa asayatsü aliba thitsüba sülen anogo ka lir iba osang sangdongogo.

IPL nung asayatsü aliba Australia nung asayartem April ita tanabuba hopta nungi 14buba IPL nung shilem agitsü atema renemba mapang asayar achaayangertemi ashiba agi, yiruyipong dang mesera NOC agütsütsü atema kecha tebilemtsü malitsü, kechiyong iba asayamungya CA official break mapa asütsü.

South Africa den Test asayatsü aliba thinenaka iba ita New Zealand nung oa T20 asaya pong asayatsü aliba

atema squad memelenshitsu. Iba asayamung atema Steve Smith, David Warner, Josh Hazlewood aser Pat Cummins nung shima mali.

Taoba küm wara poktetba ajanga IPL UAE nung wara nungi jenboa alitsü atema jenjang tapet agia asaya. Iba asayamung nung Australia nung asayar 19-i shilem agia liasü.

Ajisiüka white-ball captain Aaron Finch Smith aser Glenn Maxwell densema Australia nung asayar teku parnok team-i toktsüogo aser February 18 nü IPL auction mapang parnok alitsü atema maongka angutsü.

Taruba IPL atema anogo tejangja lateta mali, ajisiüka BCCI-i iba asayamung April tanabuba hopta nungbo asayatsü atema sentong yangludat. Iba asayamung ya bio-secure environment ka nung asayatsü imlar aser asayatem tesem kar nung dang asayatsü.

BILEMDANGANG

"Mapang mamshirtemi tangar mapang lalutsür."